

Gottesdienst vom 5. Januar 2025 in Rümlingen

Predigt zur Jahreslosung 2025
1Thess 5,21

Prüft alles und das Gute behaltet

Liebi Gmeind,

Wunderbar churz und iigängig isch diä Johreslosig
6 Wort

Zu drü devo möchte-i öppis säge.

Z'erscht zu 'prüft!'.

Offesichtlich traut
dr Paulus sinä Gmeindglieder in Thessaloniki zue
dass si in dr Lag sind
z'prüefe.
Er behandelt si als mündigi Mensche
wo sich selber e Urteil und e Meinig bilde.
Hüfig in dr Bible wird s'wort *prüfen* umgekehrt verwendet
dass Mensche prüeft werde
vo Gott oder andere Autoritäre,
wie im berühmte Psalm z.B.
wo's heisst *Prüfe mich Gott auf Herz und Nieren*.
Im Brief vum Paulus wird de Leserinne und Leser zuetraut
dass si selber mündig sind
z'prüefe,
mündig, zum selber för sich z'entscheide
was guet isch för se.
Das isch umso bemerkenswerter
will Thessaloniki e pulsierendi Hafestadt gsi isch
mit Mensche us allne Herreländer.
Dr Paulus isch öppe 3 Wuche dort gsi als Missionar
und hät ziemlich Erfolg gha.
Denn aber isch es zu Tumult cho
und dr Paulus isch gflohe uf Athen und denn uf Korinth.
Vo dort us hät er sini Briefe an d'Gemind in Thessaloniki gschriebe

churz noch 50 noch Chrischtus.

Die Briefe sind also di ältische Schrifte im neue Testament
älter als alli Evangelie und di andere Briefe.

Wiä alli grosse Hafestädt isch Thessaloniki en Schmelztigel gsi
vo unterschiedlichste Kulture und Religione.

Dodrin traut dr Paulus sine Lüt zue
z'prüefe, was för si passt.

Ich hett-i eigentlich ehner erwartet
dass er warnt vor de Gfahre vo fremde Kult und Ideologie
und dass er zu Vorsicht mahnt vor falsche Prediger und Prophete.
Aber nei, er sait
Prüft alles.

Dr Form no allerdings isch es scho e Mahnig
oder ämel e Uffforderig
oder e Illadig mindeschtens.

Einersiits isch es e liladig zur Offeheit:
Prüft alles

Wenn ich das hüt ghör, denn isch diä liladig en Kontrapunkt zur Polarisierig.
S'Johr 2024 hät in minere Wohnemig d'Tendenz verstärkt
dass verschieden Lager sich gegesitig gar nümme wüchlich wohnemme
und nume no bekämpfe oder ignoriere.

Verschiedeni Gräbe werde tiefer
und me isch nume no in dr eigete Bubble unterwegs.

S'Prüft alles isch en Biitrag,
au völlig andersch denkende Mensche zuez'traue,
das si prüfenswerth Argument und Gründ händ
und vielleicht händ si sogar recht.

Zum prüefe, muess me mindeschtens anelose und welä verstoh
sus isch es jo nid es prüefe,
sondern es ignoriere und links oder rechts ligge lo.

Das lueg-i au als Ufgob för d'Chilene a
dass mr en Biitrag leichte
nid zur Polarisierig sondern zu Ustuusch und gegesitigem Verständnis.

En zweite Aspekt vum *Prüfet alles*
hät för mich mit dem ganze Thema Fakenews, Manipulation - dur KI,
Werbig & Propaganda, Desinformation,
Salonfähigkeit vor bare Lüg etc. z'tue.

Ich glaub, dr Paulus wüer sich im Grab umtreie,
 wenn er wüsst
 wia aaspruchsvoll das *'Prüfet alles'* gworde isch.
 Immer meh muess me sich froge:
 Stimmt das, was i do lies, ghör und gseh?
 Im *Prüefe* steckt es gwüsses Misstraue,
 wo nötig und aagmesse isch.
 Vieles,
 eigentlich alles isch kritisch z'hinderfroge.
 Aber wenn s'Misstraue dezue füehrt,
 dass me gar nüt me glaubt und nume no vor *Lügepress* redet
 und devo, dass d'Medie und Politik sowieso es verlognigs Pack sind
 jo den prüeft me ebe nid,
 sondern resigniert
 und vor Resignation profitiere nid di Richtige.

Ganz konkret heisst för mich das *'Prüfet alles'*
 dass ich Hilf bruch bim Prüefe.
 Diä Hilf bechum-i z.B. vo unabhängige, vertrauenswürdige Medie.
 Ich bin drum grundsätzlich gege Chürzige vo Mittel för di öffentlich rechtliche
 Sender.
 Und ich bechum Hilf zum prüefe
 dur d'Entlarver vo Lüge,
 wo mit ganz bestimmte Interesse in d'Welt gsetzt werde.
 Und ich bechum si vumene funktionierende Rechtsstaat
 wo Fakenews-schleudere wiä d'Plattform X oder tiktok in Schranke wiest.

Zum zweite Stichwort

Das Gute

Prüft alles und das Gute behaltet.

Was isch das 'das Gute'?

Mir chunnt d'Gschicht in Sinn,
 wo en riiche Jüngling Jesus aaspricht mit
Guter Meister
 Und Jesus reagiert ziemlich unwirsch und sait em
Was nennst du mich gut, niemand ist gut ausser Gott

Interessanterwiis git's im Griechische zwei Wort

wo im Dütschte mit 'gut' übersetzt werde.
 Ir Gschicht mit em 'Guter Meister' stoht *agathos*
 d'Bezeichnung wo'mr vum Name Agathe kenne.
 Dr Paulus bi sim '*und das Gute behaltet*'
 brucht s'Wort *kalos*.

Das isch ufschlussriich
 will *kalos* au *schön* heisst.

Es isch viel drüber nochdenkt worde
 wiä e *das Schöne und das Gute* zämmeghöre
 ... und wiä aber au nid.

Ich möcht das Fass nid würrklich ufmache
 sondern nume das drus neh
 dass dr Paulus mit sim 'Gut / Schön' öppis meint
 wo'me gseht.
 Do chunnt mir dr Satz vo Jesus in Sinn
 wo'ner sait
An den Früchten werdet ihr sie erkennen.
 Isch es öppis guets, was bi dem usechunnt, wo'ni mach?

Guet gmaint
 Guet ins Bild gsetzt
 Guet gschwätzt
 Guet versproche
 Guet nume för e Minderheit
 Etc.
 Das isch no nid guet.
 Guet isch, was sichtbar gueti Frucht bringt.

Und bi dem sichtbar spielt d'Schönheit glaub scho n'e Rolle

Würrklich schön find-i z.B. s'Gsicht vumene glückliche, z'friedene Mensch.
 Schön findi Mensche, wo ume'nen deckte Tisch sitze und gnuet bechömmen.
 Schön findi e intakti Natur.
 D'Armuet hingege und Chrieg händ ganz hässliche Gsichter
 Und zerstörte Landschaften au.

Es wär interessant dr Paulus z'froge
 an was er denkt, wenn er *kalos* schriibt, guet und schön.

Ich bin ziemlich sicher
 Es hät öppis mit Wert z'tue, wo sichtbar werde.
 Es git demit dr Blickwinkel aa,
 worufhi me alles söll prüefe.

Dients em Guete und Schöne?
 Oder wem oder was dients?

Und dodemit bini bim 3. Stichwort:

Behaltet

Und das Gute behaltet.

Bim Stichwort b'halte chunnt mr di chliini Szene in Sinn
 wo bim Ruume öppert öppis will fortschiesse
 und dr ander riist's em us dr Hand
 und sait,
 spinnsch, das b'halti und drückt's an sis Herz.

Im B'halte steckt e Wertschätzig.

Wenn i vorher d'Schönheit vo glückliche, z'friedene Gsichter
 vo Mensche umenen deckte Tisch
 vunere intakte Landschaft
 erwähnt ha,
 denn redet das B'halte au vor Wertschätzig und Dankbarkeit
 dass es das Guete und Schöne git
 und mr selber Aateil händ devo.

Ich glaub
 das isch wirklich en Teil vor Lebeskunscht
 das *ans Herz drücke* vo dem was guet isch im Lebe.
 So schnell verschwindets in dem was me sött und wett und muess
 und was müehsam isch und Angscht macht.
 Debi: wieviel Guets und Schöns treffem'r äfaach aa
 und fällt üs in Schoss.

Und in dr Geste vum *ans Herz drücke*
 chunnt au öppis vum wella *Sorg geh dezue*
 und's Schütze zum Usdruck
 bis hi zur Haltig, das verteidige n'ich
Spinnsch eighetlich, das b'halt-i.

S'Gegeteil vo B'halte
isch Priis geh, uf's Spiel setze, verrote,

Migrationsdruck,
wirtschaftliche Eigendynamik
und allerlei Kulturkämpfe
händ au im letschte Jahr wieder
Strömige erstarche lo
wo lang errungeni Freiheite und Recht zu Disposition stelle.
Di humanitäre Tradition vor Schwiiz
di allgemeini Deklaration vo de Menschenrechte
liberali Verfassiger vo Rechtsstaatlichkeit
Demokratie ...
in wiite Teile vo Europa und dr Welt
wird das in Frog gestellt dur autoritäre Tendenze.

Das macht mir Angscht.
D'Errungeschafte vum liberale Rechtsstaat
müend als essentiell und unverzichtbar gelte.
Es isch für mich öppis vo dem Guete,
wo'mr müend b'halte,
wo'mr müend Sorg geh dezue
und à la limit müend säge
spinnsch eigeitlich, das bhalt-i
... dr Europäische Gerichtshof für Menschenrechte z.B.

Dr Aposchtel Paulus isch chrischtliche Missionar gsi.
Selbstverständlich isch für ihn das,
was er mit 'Guet' verbunde hät
Das Gute behaltet
eng verchnüpft gsi mit Jesus Christus.
Das isch es für mich au.

Aber mir längt s'Etikett chrischtlich oder chirklich nid.
Leider mische au di chrischtliche Chirchene und Gmeinschafte überall mit
wo autoritäre Strömige im Ufwind sind:
Di serbisch und di russisch orthodoxi Chille understütze offe Autokrate und
Chriegstriiber in ihrem Land.
Dr Viktor Orban isch en stramme Reformierte und baut systematisch
d'Demokratie ab in Ungarn und pfiift uf Menschenrechte,

In Brasilie z.B. wird dr Bolsonaro vo unzählige chrischtliche Freichirchler wiä en Messias verehrt.

Und au bi üs vertrete sehr chirchliche Lüt und bekennendi Chrischtinne und Chrischte

grad öppe s'Gegeteil vo dem

was ich under em Guete verstand, wo söll b'halte werde.

Das machts natürlich nid eifacher.

Aber dodemit chan-i wieder dr Boge zruggschloh zum Aafang:

Prüft alles

D'Bible traut üs zue,

selber z'denke und Entscheidige z'falle.

?Was isch es

wo Mensche glücklich und z'friede ... schön macht

was isch es, wo defür sorgt,

dass alli Mensche amene deckte Tisch chönd sitze

was isch es, wo zu'nere intakte Natur biitrait?

Prüft alles, und das Gute behaltet.

Amen